

永樂大典方志輯佚

江西志

〔人物〕

唐施肩吾，字希聖，江州人。工詩文，舉進士第，不調官，入廬山遇呂洞賓，授金丹之妙，著《三住銘》。三住者，謂氣住、神住、形住也。〔冊九一卷八二六九頁三〕

豫章志

〔山川〕

天寶洞，在江西南昌府新建縣西八十里西山最勝處也，《道經》所載第八洞天，極元曹真人所隱之地，其詳見《職方乘》。熙寧中，楊無爲嘗有二詩云：「層梯險峻出瑤臺，遊者多從半路回。天寶洞中如不到，西山元似不曾來。」又云：「極元真人養真處，石門隔斷紅塵路。玉簾今古不曾收，只有白雲晚歸去。」

唐曹德休自言從東海青嶼山來遊於江西，人見之三十餘年，顏貌不改。常行人間，有疾者，以符藥救之，無不立愈。有女子爲蛟所魅，德休投符潭中，蛟腦裂，浮死水上，亦不受謝。德休謂人曰：「若有疾苦，不必就吾求符藥，但以江魚膾一盤并米酒一壺饗我，其疾自愈。」鄉里如其言，無不驗，人皆神之。後忽告人曰：「我捨此入西山天寶洞去矣。」後無復見者。

天寶洞天，《名山福地記》云：三十六洞天第十三洞天，在洪州西山，曰「天寶極玄」之天。隋仁壽二年，嘗詔於此立觀，以「天寶」爲名，有唐明皇所書門額存焉。自洪崖山行三十里，距山足曰淨真觀，峻折上山五里，得天寶焉。絕澗緣磴，蛇行而上五里至洞，洞去頂二里而遙，林木莽蒼，上甚峻極，平視數百里，縈青縷白，他山如拳，大江如帶矣。洞門有石壁，高廣數丈，中有石罅，長七八尺，闊才及寸，泉滴瀝不絕，狀如水簾，人稱爲玉簾泉。或以杖探石罅，不見其際，以物投之，則其聲泠泠然若墜絕壑。宋時嘗遣投金龍玉簡於此。《茅君內傳》云：天寶洞天，其山有觀八所，壇七所，洞在天寶源，其山西石室不可勝紀，其大者可容百家。唐末居民多於此避寇，往往獲銅鐵古器焉。徐鉉《稽神錄》云：豫章逆旅梅氏，嘗有一道士衣裳藍縷，來止其家，梅厚待之。一日謂梅曰：「吾來日當設齋，從君求新甃盃二十，匙筯百副，君亦宜來食，可於天寶洞前訪吾也。」梅許之。道士持盃渡江而去。

梅翌日詣洞前，問村中人，莫知其處。久之，將還，偶得一逕明淨，試尋之，果見一院，有青衣童應門，問之，乃陳君。一作居也。入見道士，衣冠華楚，延與之坐，命具食。頃之，食至，乃熟蒸一嬰兒，梅懼不下筯。良久，又進食，乃蒸一犬子，梅亦不敢食。道士嘆曰：「千歲人參、枸杞，不識奈何！」送之出山。後再往，則迷路矣。（冊一百三四卷一三〇七五頁六）

東湖，在郡東南，周廣五里。酈元云：東湖，十里一百二十六步，北與城齊，迴折至南塘，本通大江，增減與江水同。漢永平中，太守張躬築堤，以通南路，謂之南塘，以潴水，冬夏不增減，水至清深，魚甚肥美。每夏月以水泛溢塘而過，居民多被水害。宋景和年，太守蔡興宗於大塘上更築小塘以節水，爲水門，水盛則閉之，多則洩之，自此水患少息矣。唐貞元二年，都督張廷珪奏，改曰放生池，而立碑焉。五年，江水踰塘一丈，觀察使李巽躬率吏民以土囊固護，立碑以誌其事，碑既亡。九年，觀察使齊映復加修築。元和三年，刺史韋丹復建南塘斗門，以洩暴漲。遼湖築堤，高五尺，長十二里。明年，江與堤平，無復水害。元和十三年，道州刺史韓衢作《東州亭記》。宣宗時，塘東有三亭：曰孺子，曰碧波，曰涵虛。乾符中，因亂悉廢，今復葺。（冊十九卷二二六二頁四）

金鍾湖，在南昌府豐城縣西五十里天寶洞上。故老云：萬天師既入長安，武后尊崇之，問以道要。天師堅求還山，武后賜以金鍾、玉磬。天師既仙去，遺金鍾、玉磬於湖中，至

今名金鍾湖。〔冊二十卷二二七〇頁十六〕

【城池】

南昌府城，雷次宗《豫章記》云：郡城，漢灌嬰所築，有六門。南二門：一曰南門，一曰松陽門。西二門：一曰臯門，一曰昌門，是孫伯符遣虞仲朔來與華府君相語處。東、北各一門，以東、北爲名。晉太康中，太守范甯更開東之北爲東北門，以對臯門；又開北之西爲西北門，以對松陽門。合八門也。〔冊九十卷八〇九一頁二〕

孫奮城，在郡東北二里。奮爲齊王，都武昌，諸葛恪執政，不欲諸王處江濱，徙奮南昌，蓋居於此。酈元云：贛水東北經王步，步側有城，云是孫奮爲齊王鎮此。此城之渚，今謂之王步，蓋齊王之渚步也。郡之東南二十餘里，又有一城，號曰齊城。二城築道相通，蓋其離宮也。〔冊九十卷八〇九一頁四〕

椒丘城，在郡北下流一百四十里。酈元云：贛水又經椒丘城下。建安中，孫策所築。《豫章記》云：劉勳，建安四年爲孫策所破於潯陽，欲謀取豫章，太守華歆築此城。《江表傳》云孫策在椒丘，遣虞翻說華歆，即其地也。〔冊九十卷八〇九一頁三〕

劉繇城，在南昌縣東北三十五里。《吳志》云：繇爲揚州刺史，畏袁術，不敢之州，乃治曲阿。興平元年，爲孫策所攻，繇奔丹徒，遂泝江南保豫章，駐彭澤。笮融先至豫章，殺太

守朱皓，入居郡中。繇招合屬縣，攻破融，融敗走入山，爲民所殺。繇尋病死於郡。此城蓋當時所築，城壘甚堅，至今猶存，號爲劉繇城。〔同前〕

余城，《涂廩志》云在建昌縣南湖井村。余孝項，字希託。梁時侯景別將于慶入豫章，進攻新吳，孝項起義兵拒之，因築此城。後爲太尉王僧辯所擢，官至陳、蔡二州牧。《方輿記》云在新吳縣西十五里，周回三里餘。〔同前〕

分寧縣城，周回四百八十步。〔冊九十卷八〇九一頁五〕

靖安縣城，周回二里。〔同前〕

【倉廩】

新喻縣苗倉，在開化寺左。〔冊八一卷七五一六頁十六〕

【宮室】

五賢堂，在南昌府。祠西漢南昌尉梅福子真、東漢豫章太守陳蕃仲舉、處士徐穉孺子、晉豫章太守范甯武子、唐江南西道觀察使韋丹文明。宋朝慶曆七年，太守張瓌塑五人之像，卽州治之西偏，依城立樓，樓之下東向爲祠，刻石以紀之，其略曰：「禮賢若陳仲舉，興學若范武子，遺愛若韋文明，直言若梅子真，有道若徐孺子，是皆有功有德於民，禮宜祀焉。」榜曰「德祠」，不名之以「五賢」，必有來者，不拘於數也。今洪民直謂之五賢堂。〔冊六九

卷七二三六頁二十七

【寺觀】

晉隆安四年，刺史胡尚書捨宅建崇勝禪院。於井東北十五里之雙嶺，有謝靈運翻經臺，亦號康樂臺。〔冊三十卷二六〇三頁十〕

遊帷觀，今名玉隆萬壽宮，在西山之東南，許旌陽故宅也。有石函一，舊說函有縫而不可開。唐初，張善安撫洪州，強取開之，得符云：「五百年後有狂賊張善安開之。」善安惶駭，復還舊所。〔冊一百卷九七六二頁五〕

香城蘭若，在洪井上二十里西山最幽絕處，有西土娑羅樹。〔冊一百五二卷一四五三六頁十〕

【古蹟】

吳城，在豐城縣西南三十里。云孫鍾種瓜之地。鍾，即孫權祖也。〔冊九十卷八〇九一頁四〕

太史慈城，《涂廩》云在建昌縣西三里。漢末建安八年，荊州刺史劉表從子磐數寇艾、西安諸縣。孫策經略江淮，分海昏等六縣，以太史慈爲建昌都尉，築此城並督諸將以拒磐。孫權統事，以慈能制磐，委以南方之事，後卒於海昏。《方輿記》云在新吳縣西四十里，周回三里，基址尚存。〔同前〕

西平縣故城，圖經云在分寧縣西一百九十七里。《後漢書》：鄧通，西平人。即此地也。故分寧縣有通宅基存焉。又云在分寧縣三百里。唐武德五年置，貞觀三年廢。開成六年再置，開寶二年復廢。〔冊九十卷八〇九一頁五〕

西安故城，在分寧縣西二十里。漢建安中置縣，隋開皇九年廢。〔同前〕

〔人物〕

隋司徒〔陳〕果仁，字世威，晉陵人。後漢太丘長寔十七代孫。累官至司徒。唐武德三年卒。神堯詔詢晉陵父老：「陳果仁身有八絕，何也？」對曰：「一忠二孝，三文四武，五義六信，七謀八辯。」江西人懷其德，立廟於城南以祀。唐封忠烈公。南唐李氏時，神嘗以陰兵助征伐，再冊爲武烈帝。〔冊四四卷三二一三三頁二十四〕

南漢王定保，字翊聖，郡之南昌人也。登光化中進士第。寧遠軍節度使龐知禮辟爲巡官，後累遷拜中書侍郎平章事。是夕夢人以柳數千株環植其居，周傑告之曰：「柳柔脆之物，榮落先於衆木，公宜善自調護。」是年冬，果以疾卒。贈司空。〔冊百三十六卷一三二四〇頁十三〕

蘇雲卿與張浚魏公友，魏公既相，雲卿隱豫章東湖，鬻蔬自給。公托帥漕聘之，微服乃得見。詰朝再至，則閉關矣，啓之，惟書與金在不啓封。曾蒼山作歌云：「東湖湖面波渺瀰，東湖岸上春土肥。先生鉏雲明月曉，種來蔬甲今成畦。把茅蕭蕭環四壁，此身不願人

間識。乾坤清夷那復知，寸心杳渺黃塵隔。故人子房今九雲，交情不斷江湖濱。江西使漕却騶騎，故作敲門問字人。黃金百鎰賤一幅，多謝春風到茅屋。君爲使者吾邦民，見君容我更樵服。故人與我情重哉，君且歸矣明當來。明朝啓扉人不見，黃金不動書不開。使者持書三太息，封書徑上黃扉側。翩翩鶴馭雲冥冥，空向湖山訪行迹。向來桐江嚴子陵，曾得故人雙眼青。芒鞋却踏京華路，太史驚誇說客星。先生得書掉頭去，并此湖光不回顧。夢夫孀婦截髻鬢，亦有老大閨中女。蒼山此歌可激貪鄙。張世南《遊宦記聞》載，宋自適記蘇翁本末甚詳。宋得翁東湖遺址，面揖湖山築庵，仰高章泉先生名曰灌園庵。〔冊二七卷二四〇四頁八〕

【遺事】

松陽門內有秦時大樟樹，漢以來立廟祠之。郡人每歲選良家處子，具婚禮送廟，謂之嫁神。經夕女死，取屍焉。唐高宗時，道士胡惠超能爲符呪之術，是夕留符廟中，女得不死。於是積薪將焚樹，道俗驚懼。樹上有鸛雀窠數十，欲燒前三日，翔飛空中，徘徊不下。又四邊居宅櫛比，皆是竹木，恐火延燒。于時風吹焰直上，旁無損害。廟廢。〔冊三七卷二九四

九頁五〕

【祥異】

漢孝章帝元和元年，太守李議臨郡。二年，白鳥見南昌。〔冊二五卷二三四五頁三〕
唐高宗顯慶四年，白鳥見建昌，顏思道家羅獲送省。〔冊二五卷二三四五頁四〕

南昌府豫章志

【湖泊】

鄴亭湖，舊圖經云在新建縣北三百四十三里。湖有神，在漢及三國時，能分風上下，或與人交語。聞樂巴爲豫章太守，遂不復靈。湖北望廬山。元祐間，秦少游嘗宿於湖邊寺，惜竹軒，夢神女遺之以詩曰：「不知水宿分風浦，何似秋眠惜竹軒。聞道文章妙天下，廬山對面可無言。」舊圖經載湖屬豫章，故記之。〔冊二十卷二二七〇頁十五〕

隆興府志

【湖泊】

宮亭湖，《輿地紀勝》：宮亭湖，《寰宇記》云在州北三百四十里，有宮亭神，能分風上下。劉惔詩云：「迴流乘派水，舉帆逐分風。」秦少游宿于湖邊，夢神女遺之以詩曰：「聞道文章妙天下，廬山對面可無言。」〔冊十八卷二二六〇頁十八〕

豫章續志

【山川】

北巖。在江西南昌府武寧縣東北二十里解空院後有北巖。尋山北去可一里許，洞穴如圭竇，必崎嶇而後入，有石田、石鹽、石佛、石禾、石粟之類。（冊一百卷九七六六頁十九）

畫洞，在江西南康府進賢縣東六十里，其山勢如畫，故名。有雷度讀書庵，在洞之側。

〔冊一百三四卷一三〇七四頁十六〕

彭蠡湖，去進賢縣一百二十里，瀰茫浩渺，與天無際，接三州之境，東則饒州，西則南康軍，北則都昌，南則本縣。《禹貢》所謂「彭蠡既豬，陽鳥攸居」者，即此湖也。湖之水消長有時，每春夏之間，水漲而湖愈闊，至秋冬則水縮，俗謂之落槽。（冊十八卷二二六〇頁十六）

開浚東湖。嘉定庚午，湖水汎溢，爲患甚於他時。明年春，郡別駕豐有浚深軫民病，請於權府計使胡公某，議所以開浚之。胡公然其請，且就委任之。於是大集土工，并畫棋布，衆力並舉，不踰月而辦。先是湖既湮塞，並湖居者，盡以厨廁侵逼入湖，污穢狼籍，不堪舉目。豐公親按圖籍，開諭拆除，豪家巨姓不得免。於是浚治增築，湖既泓深，隄亦堅固。沿隄上下植以萬柳，繞湖周遭通以行路，樓觀園圃，左右映帶，四時遊觀，車蓋相望，遂爲江右

勝踐，不但免居民滄浸之患而已。尚慮後人吝費，無能嗣而葺之者，復創修湖司，撥官田若干畝，專蒞俸廳收積歲租，以備浚湖之用。〔冊十九卷二二六二頁四〕

〔城池〕

按《南昌古圖經》，府城東北角久壞，元和四年，太守韋丹修築，仍置敵樓於其上。其東門樓久亦頽毀，又改建東南敵樓。貞元十四年，觀察李巽闢而新之，號避暑樓，遇夏宴休于此。其廣豐、北郭、永泰、故豐四門皆廢。楊傑詩云：「故豐門近子真家，樓上高吟冰齒牙。帆似馬來思杜牧，劍爲龍去憶張華。溝還故道穿城角，沙漲平川壓水涯。江外西山銜落日，幾重蒼翠觀餘霞。」

遵道門。俗曰官步，有紫極宮在門內。

惠民門。俗曰寺步，以門對龍興寺也，或曰運米惠民倉自此入。舊塞，紹興二十年間帥張澄復開。

廣潤門。俗曰橋步，亦曰柴步。

德遂門。俗曰井步，旁有大古井。

章江門。古曰昌門，孫策遺虞翻與華歆交語，即此地也。舊圖經云：滕王閣在西，古昌門北，下臨章江，有渡口曰宗華，自是走高安。徐師川嘗有《章江晚望》詩云：「水面無波千里鏡，日斜倒影一溪紅。漁舟不動鳥飛急，淡淡碧煙蘋末風。」

惠濟門。俗曰倉步，以對大市。

利涉門。俗曰觀步，以近宗華觀。

洪喬門。俗曰大市，《古圖經》謂近洪崖先生藥市，故名。或曰非也，門外有石頭渡，正謂殷洪喬投書處。

望雲門。北望神京，故曰望雲。舊有此門，李帥岡移築於此，俗曰新城門。

崇和門。俗曰壇頭門，有黃紫庭壇井，號東壇。

延慶門。俗曰琉璃。晉人有耕於東湖側，獲琉璃佛像，詔立寺以奉之，今延慶寺是也，故名。

望仙門。俗曰撫州門，蓋自是走臨川也。《古今志》云：徐孺子墓，在今直南門外南昌尉廨之側。南門，即望仙

門。撫有望仙鄉，故以名。

子城，亦詳見《職方乘》。唐垂拱間，都督李景嘉復修，高一丈八尺，周二里二百四十四步，中爲大街，直達于東、西二門。俗呼東、西華門，蓋猶習李氏之舊稱也。其南則府之所治，僅居其半，其北今之親兵營與倅僚等廳也。南雖有樓，而門故塞不啓，《涂廩古今志》云今之子城門闕，是觀察使李巽所建。《南昌古圖誌》云舊止東、西門，李巽改爲雙門，創樓置鼓角焉。又《吳興記》云豫章土闕高則長沙虎食人，今豫章子城門亦不開，嘗一開之，虎輒入城，後屢開復塞者數矣。宋朝以來，東、西二門，淳化五年知州陳象輿所作，熙寧二年太守元積中所修，建炎己酉盡火於兵，紹興中三樓相繼興起，然竟置鼓角、刻漏於西門，而南門則直廢而不扉，殆猶承前之虎異也。以理推之，似或不然，長沙多虎，何預豫章利害，而輒爲之塞門，豈理也。

哉！蓋門直設廳之前，樓峙南堞之上，面納章、貢二水，旁挹筠、撫諸河，洶湧浩瀆，悉匯于樓下，而北注之彭蠡。西山之山，東湖之湖，間見層出，環擁競秀，實形勢之勝也，意者不敢直啓以當之，此所以廢而不靡歟！

西門樓。榜以鎮南軍，趙鼎帥立。上有鼓角及刻漏，制作甚精。按杜牧作《池州刻漏記》，其略云：「牧太和三年，佐吏部沈傳師江西府，暇日公與賓吏環城，見銅壺銀箭，律如古法，曰：「建中時嗣曹王舉命處士王易簡爲之也。處士精大演數與雜機巧，識地有泉，鑿必涌起。韓文公嘗與之遊。以此知豫章銅漏之法，有所自矣。」

東門樓。榜以隆興都督之府，鄧柞帥立。樓本元積中作，曾舍人鞏有記。

南昌樓。俗名南樓，左望大江，下臨閩閩，煙汀鳧渚，瞭然在目，真一郡勝槩。（冊九十卷八〇九一頁一）

【土產】

黃精。（冊九四卷八五二六頁十八）

【官署】

漕臺。轉運使始於唐開元二年，河南少尹李傑充水陸轉運使。十八年置副。以宣州刺史裴耀卿爲

江淮轉運使，仍以鄂州刺史崔希逸、河南少尹蕭旻爲之副。國朝因之，官制名稱少異，又有判官。考之實

錄，開寶九年，知昇州楊克遜兼江南諸州水陸計度轉運事，職兼東西兩路，故治不在豫章。

太平興國二年，知洪州王明兼江南西路轉運使，時止以郡守兼之，故漕臺未有治所。雍熙

中，楊緘漕江西，實始爲治焉。在府城東北二百四十步，後經兵火，紹興四年，轉運使張澄復新之，有東廳題梁可考。改卜于子城東門外二十餘步，總以外門，分爲東、西兩衙，僉廳居其兩間。舊無門，止循東西兩司左右廡往來。淳熙十年九月，漕使蘇峴始爲之，於後漕使不並除，臺治亦偏廢，歷年既久，悉多圯壞。紹定改元，運判史公彌念悉徹其舊，鼎建爲一，規模宏麗，大非昔比。〔冊三一卷二六〇六頁五〕

〔宮室〕

五賢堂，舊在州治之西，詳見《豫章志》。後遷于開元寺之西廡，兵火之後，祠與記皆不復存，而德音不已，遺烈如在。紹興五年秋，毗陵胡帥世將假守，復立祠于故基稍南，訪求遺像，命工繪畫，以時舉祀典，且爲之贊。梅子真贊云：梅僊子真，補吏南昌。去求假傳，爰貢卑囊。指世陳政，厲志竭精。美高紉秦，斥鳳伸章。謂當察景，亡失其柄。允矣多士，爲國重器。衆賢聚朝，人斯畏忌。何以徠之，道在砥礪。載鵲遭害，仁鳥增逝。毋爲按圖，求驥於市。爰述孔裔，宜後成湯。紹嘉崇德，自我推明。由鳳及莽，卒解漢綱。防之亡及，吾言有徵。逝將遠遊，乘雲帝鄉。陳仲舉贊云：汝南多賢，仲舉其尤。一室蕪穢，厲志自修。元禮刺部，威行予州。屬城引去，仲舉獨留。縣榻兩郡，始自周璆。忤冀左遷，救雲坐免。社稷是爲，見非必諫。授邑不義，上奸象緯。傾宮可嫁，天下將化。盤遊肆縱，當念

三空。黨錮死徙，阮儒何異。竇氏臨朝，初被寵褒。覽節昕甫，嬈及群女。常伏厥辜，請行天誅。危言上聞，凶人側目。滿朝群臣，畏害耽祿。汎汎東西，如河之木。仁爲己任，寧獨懼戮。功雖不終，義激頽俗。

徐孺子贊云：孺子居鄉，少爲諸生。匪力弗食，守道躬耕。郡守方峻，門無賓客。一榻高懸，生來則設。七舉廉茂，五辟公府。皆不屑就，夫豈徒處。帝咨三賢，誰爲後先。角立傑出，孺子有焉。辭辟諸公，而懷知己。漬酒炙雞，吊喪千里。南州高士，有道我推。生芻一束，謂莫堪之。仕者行義，居者求志。共振高風，式是百世。范武子贊云：武子名家，好學多聞。進不附勢，見抑於溫。弼晏崇虛，蔑棄典文。禍深桀紂，乃坐清言。我辭關之，既塞亂源。言以述志，位以行道。粵自爲邑，亟興學校。暨登牧守，益明孔教。俗尚禮樂，人知忠孝。志與道行，世推儒效。

韋文明贊云：元和中興，吏多循良。孰爲第一，世推武陽。武陽臨民，召父杜母。其在江西，功德最厚。洪有災害，民不知避。孰圖去之，自我興利。有堤如截，水不城齧。萬瓦鱗鱗，邑居不焚。陂六百所，溉田萬頃。歲丁大旱，五穀垂穎。民或未勸，以誘其訓。匪嚴其程，卒用有成。歿四十年，稚老歌思。帝命史臣，播厥聲詩。章水滔滔，西山峩峩。與詩永久，公名不磨。

隆興元年，鄧帥柞重建於府治東北。淳熙七年，張帥子顏又徙於府治東南，今在府學殿門外，併賢牧爲兩祠。（冊六九卷七二三六頁二十七）

愛民堂，在南昌府漕臺。紹興二十八年，副使李邦獻建，以陛辭曰「玉音訓以愛民」，故爲名。今在正廳東，史運判彌念改築，存其舊址。〔冊七十卷七二三八頁二十八〕

志民堂，在漕臺。紹興九年，運判梁澤民建，取志於愛民之義，今已廢。〔冊七十卷七二三八頁三十五〕

思政堂，在漕臺正廳西。史運判彌念改築，存其舊名。〔冊七一卷七二三九頁五〕

進賢縣尉廳之西有三賢堂，蓋慕梅子真、臧嘉猷、鄭公真諫而立。淳熙癸卯，黃汝嘉重葺。〔冊六九卷七二三六頁十五〕

分寧縣治有堂曰民肥，邑宰蕭從建。〔冊七十卷七二三八頁三十五〕

船齋，在漕臺，副使魏安行書，已廢。〔冊三十卷二五四〇頁十四〕

【寺觀】

新建縣西山之南廣福觀，有瑞鳥，紅味翠羽，其狀若鸞，翔集林麓，人或見之，多爲休徵。〔冊二五卷二三四五頁十五〕

郡之建德觀，有玉皇天尊金銅像。〔冊一百七一卷一八二三四頁二〕

【古蹟】

都尉故城，在南昌縣南三里，北連郡城，隋大業二年置，三年廢。〔冊九十卷八〇九二頁三〕

豐城縣城有二門，南門揭縣額，北門榜曰登要。〔冊九十卷八〇九一頁四〕

黃金城，富城縣故基也。在縣西二十里長豐鄉，今遺址具存，本漢建安中置。〔同前〕

始豐城，基在豐城縣南七十里。〔同前〕

黃牛城，在進賢縣南五里。父老相傳，以爲黃帝戰蚩尤時駐於此，舊於其地中得箭鏃。今故基尚存。〔同前〕

奉新縣有古城，隋張文憲所築也。又有今城，唐劉正一所築也。按隋大業十年，詔天下州縣皆築城，縣有漢所築舊城，險不可守，縣令張文憲乃修城居焉。今地名故縣是已，在今縣西三十里，城之規畫髣髴猶存焉。唐神龍三年，縣丞高良弼又以阻險，民不安居，議遷縣於憑水之北。長慶三年，縣令劉正一率邑人修城以居。其高闊不滿尋丈，其東有溝，其西有溪，南、北二門，抵鎮遏營。城周五里五十步，東西三里五十步，南北二里。〔同前〕

〔人物〕

裘萬頃，字元量。其先裘牧爲宋大夫，十七世孫睿，仕西晉，居婺女，子尚徙居會稽。自尚至治，二十一世，家無異爨，聚族六百。宋真宗祥符六年，詔旌表裘氏義門。〔冊四九卷三五二八頁五〕

胡直孺，字少汲。其先宿州宿遷人，後徙豫章之奉新，爲著姓。曾祖仲容，嘗爲光祿寺